

E mercado ta sigui crece: 91% te cu Mei 2025
**EHECUTIVONAN DI TURISMO
DI ARUBA TA SIGUI DUNA
PRIORIDAD NA BRASIL**



WWW.SOLODIPUEBLO.COM



SOLODIPUEBLO@GMAIL.COM

**MIKE DE MEZA A DUNA
MINISTERIO PUBLICO ULTIMATUM:
“SI NO DUNA CONTESTA PA 4'OR
DI AYERATARDI, LO CUMINZA UN
CASO CONTRA OM”**



**MINISTER DI
INFLACION SR. WEVER
NO TA COMBATIENDO E
AUMENTO EXPLOSIVO
DI PRIJSNAN NA
ARUBA!**



**PARLAMENTARIO
WEVER-CROES
TA CONDENA
E ATAKENAN
CONTRA
EMPLEADONA
PUBLICO**



**TA PIDI PROME MINISTER PA TUMA UN
DECISION DEN E CASO DI MIKE DE MEZA**


CURPA SIN BIDA HAYA NA ARASHI

Arashi - Dialuna anochi den careda di 10'or un auto ta wordo haya na Arashi, basta panort di e parkeerplaats unda hende ta bishita hopi.

Den un vehiculo a bin haya un persona

cu no tawata duna señal di bida. E auto tawata staciona cerca di e beach. Mesora a notifica tur instancia y tambe ambulance segun protocol.

Lo ta trata di un persona masculino.\



ALGO STRAÑO PASANDO NA K.I.A. DETENIDO DESNUTRI Y DESHIDRATA AMBULANS A BAY MAS DI 2 BIAHA Y TA CANCELA

Dialuna a habri cu dokter na K.I.A. ta constata deshidratacion cerca detenido(nan) ? y ta pidi ambulans pero despues ta cancela. No ta conosi cua preso ni kiko ta pasando e ni pakiko. Presonan ta preocupa cu e situacion.



ACCIDENTE DILANTI DI D-SHOP NA SASAKI

Dialuna anochi a drenta informe di un accidente dilanti D-Shop riba e caminda di tera na Sasakiweg, mesora a dirigi un patruya na e sitio.

Na yegada di e patruya a bin compronde cu un Pick-up a perde control bay dal riba un Lexus lague destrui sin por core riba su mesun forsa te cu takelwagen mester a bin busk'e.



E FORMULARIO DI DECLARACION DI INKOMSTENBELASTING 2024 A SALI

E fecha oficial di otorgamento ta 1 di augustus 2025



ORANJESTAD – Den e diano nos dilanti, e contribuyentenan cu ta registra pa inkomstenbelasting lo bay ricibi nan formulario di declaracion di inkomstenbelasting di aña 2024 via post manera custumber.

Fecha oficial

E fecha oficial di otorgamento ta 1 di augustus 2025. Pa ley e contribuyentenan ta haya 2 luna di tempo pa yena y entrega e formulario menciona; pues e ultimo dia pa entrega esaki ta dia

1 di october 2025.

Extension di termino

Banda di e termino legal di 2 luna, Departamento di Impuesto ta duna automaticamente 2 luna mas di tempo pa por entrega e declaracion aki. E fecha final pa e contribuyentenan cu kier haci uzo di e 2 luna extra di extension ta 8 di december 2025. No tin mester di haci un peticion oficial pa haci uzo di e extension (“uitstel”) menciona.

Prepara documento

Departamento di Impuesto ta recomenda su contribuyentenan pa cuminsa prepara e documentonan necesario relaciona cu entrada y gasto di aña 2024 por ehempel: salario anual, pensioen di trabou, pensioen di biehes, pensioen di viudo of huerfano, entrada di huur di propiedad, entrada di ‘side-jobs’, carta di interes di banco y/of otro instancia, seguro di bida, comprobante di donacionnan haci, comprobante di gastonan di scol di yiu cu ta studia den exterior etc.

E contribuyentenan cu tin un empresa propio (eenmanszaak), tambe mester prepara nan relato anual di aña 2024. Den caso cu e contribuyente mes no por traha e

relato anual aki, ta recomendabel pa busca un consehero fiscal cu conocimiento adecua di e materia di impuesto.

Obligacion legal

Yena y entrega e formulario di inkomstenbelasting ta un obligacion legal di cada contribuyente. Door di yena y entrega e formulario na tempo, e contribuyente ta evita cu e ta haya un cobranza (taxativo) cu boet. Ademas pa medio di e declaracion, e contribuyente ta haya e oportunidad pa haci uzo di su derecho di deduci su gastonan.

Gerencia di Departamento di Impuesto 10 di juni 2025

E mercado ta sigui crece: 91% te cu Mei 2025

EHECUTIVONAN DI TURISMO DI ARUBA TA SIGUI DUNA PRIORIDAD NA BRASIL

Pa hopi aña caba, e mercado di Latino America ta e di dos mas importante pa Aruba, despues di esun Norte Americano. E crecemento a bay rapido y impresionante, aportando na un bon mix di pasahero pa por cumpli cu e demanda pa camber y actividadnan turistico riba nos isla. Pero pa por a logra e resultadonan aki, ta rekeri hopi preparacion, mercadeo, strategia y bon relacion cu tur partner den e mercadonan. Y ta precisamente esaki ta locual e siman aki ehecutivonan di turismo di Aruba ta haciendo na Brasil.

E siman aki Ronella Croes, CEO di Aruba Tourism Authority (A.T.A.), ta di bishita na Brasil hunto cu Jordan Schlipken-Croes, A.T.A.'s Area Director pa Latino America y Jo-Anne Arends di Aruba Airport Authority pa reunionnan cu entre otro e aerolinea Gol, cu Copa, y Decolar, cu ta e bendedor mas grandi di biahe den e mercado. Banda di esaki tin un delegacion mas amplio di representantenan di A.T.A. y sector priva entre otro reuniendo cu tur socio clave, y asina tin mas activacion e siman aki cu ta inclui tambe presencia di Aruba na 'Taste' cu chef Urvin Croes.

Ta bon pa menciona cu den e investigacionnan haci pa Visa y Mastercard, a conclui cu Brasileronan ta entre e bishitantenan cu mas ta gasta na Aruba durante nan vakantie. Como tal, A.T.A. ta haci extra esfuerso pa por sigui desaroya e mercado aki, pa atrae mas di e turistanan afluente cu ta gasta mas, tanto na alohamento, na transporte, cuminda y bebida y na haci compras.

Gol Airlines

E reunion cu Gol Airlines a enfoca riba revisa e metrickonan di rendimiento pa cu e ruta, cu actualmente ta coriendo na un averahe di 80% di ocupacion di tur e stoelnan disponibel den cada vuelo pa y for di Aruba. Lo discuti tambe riba tur e oportunidadnan strategico pa e resto di aña 2025 y cu miras pa aña 2026. E meta ta pa fortifica e relacion y mantene lasonan estrecho cu e aerolinea y claro crece e mercado aki.

Aruba presente ora CEO di GOL a adresa 1,400 empleado

Ta importante pa menciona cu Gol a celebra

hunto cu su 1,400 empleadonan e salida exitoso for di Chapter 11. E liderazgo di Gol Airlines a enfatisa nan compromiso pa cu crecemento continuo y fortificacion di nan aerolinea den proximo cinco añanan. Un di nan prioridadnan principal ta expande rutanen internacional y frecuencia di vuelo, en bes di enfoca solamente riba crecemento domestico. Aruba ta un di e poco destinacionnan internacional cu nan ta sirbi awor, cu sigur ta un noticia positivo.

A invita Aruba Tourism Authority y Aruba Airport Authority pa tabata presente na e ocasion special y historico aki, caminda CEO di Gol, Celso Ferrer, a adresa e compania completo, tanto personalmente como virtualmente. Delegacion di Aruba tabata tin e honor pa ta parti di un momento cu hopi importancia y ta orguyoso pa ta inclui den e strategia internacional di e aerolinea. Ehecutivonan a yega na acuerdo pa define kiko por ta posibel expansion pa Aruba.

Copa Airlines

E ekipo combina di ehecutivonan di A.T.A. y AAA a topa tambe cu Copa Airlines, den cuadro di un encuentro di relacion y di strategia. Ey a enfoca riba revision di ruta y frecuecianan di vuelo cu enfasis riba regionnan na Brasil, specialmente esunnan pafo di São Paulo. Ta bon pa remarca cu Copa Airlines lo aumenta su cantidad di vuelonan semanal pa Aruba na december 2025, pues ideal pa e temporada halto di turismo 2025-2026.

Mercado di MICE

Adicional, e ekipo di mercadeo di Latino America a enfoca riba e segmento di MICE (Reunionnan, Incentivonan, Conferencianan y Exhibicionnan) y biahe di tempo liber ("leisure"). E delegacion di MICE di Aruba na Brasil lo probecha di e bishita pa promove nos isla como un destinacion MICE y pa promove uzo di e vuelo nobo di Gol.

Pa e segmento di mercado aki, A.T.A. a invita y ta conta cu participacion activo di partnernan manera Aruba Marriott, Renaissance Wind Creek, Embassy Suites Aruba, De Palm Tours, Holiday Inn Aruba, Barceló y Red Sail Sports. Ta tene reunionnan y sesionnan di entrenamiento cu instancianan grandi di MICE y enfoca riba grupo y tambe eventonan exclusivo pa cliente. E delegacion di biahe di tempo liber ta representa pa The Mill Resort, Divi Resorts, De Palm



Tours, Iberostar, First Class Experience Aruba y Aruba Boutique & Art Hotel. E grupo aki ta enfoca riba training di producto pa promove e ofertanan di Aruba.

Promoviendo Aruba como destinacion gastronomico

Diamars dia 10 di juni a organisa un evento di cocktail conhunto pa clientenan di e mercado Brasileiro. A.T.A. Brasil tambe lo participa na e evento culinario di mas grandi di São Paulo, "Taste Brasil", entre dia 12-15 di juni, cu Chef Urvin Croes pa promove Aruba como un destinacion culinario "premier" y tambe como un destinacion gastronomico den Caribe, cu enfoca riba e diversidad y autenticidad di e cushina Rubiano.

Latino America creciendo den aña 2025

Den e prome kwartaal di e aña aki ta nota un resultado stabiel di volumen di huespednan "stay-over" aumentando cu 3% compara cu e prome cuater lunanan di aña 2024. Aruba a ricibi un total di 518,840 huesped "stay-over" for di januari pa april 2025 compara cu 503,938 den januari pa april 2024. Un demanda stabiel y indicacion di normalisacion despues di varios aña di crecemento record den volumen. Esaki ta den linea cu e strategia di A.T.A., cu ta uno di estabilisa e volumen di huesped pa Aruba. Den e mesun periodo menciona, 81% di nos huespednan a yega for di Norte America, 12.9% for di Latino America, 4% for di Europa, y 2% for di otro regionnan di mundo. Brasil a mostra un crecemento sobresaliente cu un aumento di 76.5% den cantidad di bishitante, y un participacion di mercado record di 15.4% den Latino America compara cu 9.5% den 2024. E mercado Brasileiro ta indicando un recuperacion fuerte y un potencial di crecemento continuo pa futuro.

Minister Geoffrey Wever

SANTA ROSA ARUBA TA PARTICIPA DEN CONFERENCIA “FARMING THE FUTURE” NA HULANDA



Oranjestad, 9 juni 2025 – Recientemente un delegacion di Departamento di Agricultura, Criadero y Pesca, Santa Rosa Aruba, lidera pa directora sra. Nathalie Maduro, a asisti e conferencia internacional “Farming the Future”, organisa pa farmingthefuture.nl na Hulanda.

caminda profesionalnan di agricultura y produccion di alimento ta conecta, network y comparti conocimiento riba futuro di agricultura. E evento ta enfoka riba temanan manera smart farming, practicanan sostenibel y innovacion den sector agri-food. Tur esaki ta alinea cu e vision y maneho di minister di Sector Primario, Geoffrey Wever y den cuadro di e Programa di Gobernacion AVP-Futuro, unda cu a acorda cu lo percura pa hisa produccion local di fruta cu berdura y stimula e produccion di fruta y berdura localmente uzando tecnologia cu ta compensa pa e limitacionnan di nos clima, obtenibilidad di tereno y suela.

Durante e conferencia, e delegacion di Santa Rosa a topa cu diferente expertonan internacional



y promotornan di agritech Hulandes pa analisa entre otro:

- Tecnologia pa smart farming, agricultura di precision y digitalisacion
- Strategianan pa agricultura inclusivo cu naturalesa y regenerativo
- Forma na pa reduci desecho di cuminda, mehora calidad di cuminda y fortalece sistema di produccion local di cuminda

“Nos ta trahando duro

riba implementacion di agricultura moderno y innovativo na Aruba, usando tecnologia y innovacion den agricultura, pa asina nos haci Aruba menos dependiente di importacion y duna oportunidad na nos localnan pa tin un negoshi den agricultura y e participacion di Santa Rosa na e forum aki ta parti di nos strategia pa logra esaki”, segun Minister Geoffrey Wever.

KIA RIO A BAY SORTIA PA BIRA NA MAN ROBES PERO UN TRUCK PASANDO A DAL E DEN BANDA

Dialuna mainta a drenta informe di un accidente cu hende herida na Cumana, mesora a dirigi tanto polis como ambulans na e sitio. Na yegada di e patrulla a bin compronde cu aki ta trata di un auto Kia Rio bayendo pariba cu a bay sortia pa bira na man robes pero no a sortia suficiente y e truck a pasa su tras y rasp’e.

Debi na esaki e chauffeur di e Kia aki como cu e ta recién opera ela y a resulta herida. Na yegada di e ambulans nan a atende y a transporte pa hospital. Polis a hiba e auto Balashi como cu e auto a keda sin chauffeur.



Parlamentario Evelyn Wever-Croes

PARLAMENTARIO WEVER-CROES TA CONDENA E ATAKENAN CONTRA EMPLEADONA PUBLICO Y TA PIDI PROME MINISTER PA TUMA UN DECISION DEN E CASO DI MIKE DE MEZA

O R A N J E S T A D - Dialuna 9 di Juni 2025, Parlamentario Evelyn Wever-Croes hunto cu colega Rocco Tjon a tene un conferencia di prensa pa asina adresa e atakenan cu tin riba empleadonan publico relaciona cu e caso di Mike de Meza. Tambe durante e conferencia aki, Parlamentario Wever-Croes a elabora riba e desaroyonan di e caso desde diadomingo ultimo.

Parlamentario Wever-Croes a expresa cu empleadonan publico ta esnancutisirbicomunidad y tur e atakenan aki contra nan, sea contra hefe di un departamento of su ekipo, no ta husto. Pa e motibo aki ta pidi e gobierno nobo pa interveni y stop e atakenan aki mirando cu e atakenan aki ta bin di nan seno.

Pa loke ta e caso di Mike de Meza, Parlamentario Wever-Croes a expresa di ta den “shock” pa tende cu awor tin un caso penal contra de Meza su persona. Loke ta mas sorprendibel ta e echo cu lider di partido AVP señor Mike Eman, tabata sa di es situacion aki caba y no a duna informacion na su coleganan di partido. Riba dj’e el a manda de Meza bay bringa su caso den corte sabiendo con grave e

situacion ta.

Peor ainda ta e echo cu awe 6 luna despues di eleccion ainda no tin un gobierno completo. Aruba tin falta di liderasgo, cu kiermeen bou di tur circunstancia lidernan tin cu tuma decision, paso ta p’esey pueblo a pone bo eyan. E no ta asina cu bo kier bira un Minister President of un Vice Minister President di un pais pero bo no kier tuma decision. Den e caso di señor de Meza tampoco ta husto con e cos aki a desaroyayunda hopi hende a wordo lastra. P’esey ta ora pa señor Mike Eman tuma un decision pa caba y pone fin na e situacion aki y na tur e atakenan riba medionan social. Tambe ta ora pa de Meza cuminsa saca su conclusion paso e situacion cu e ta aden no ta facil.

Aruba no ta custuma pa keda sin liderasgo y ta stagna. Despues di e pandemia Gabinete Wever-Croes a traha hopi duro pa estabilisa e pais. Ya caba tin 2 luna cu e gobierno a huramenta pero no ta completo ainda y no ta tumando decision. “P’esey mi ta haci un apelacion na e gobierno aki pa tuma un decision y kibra e secuestro cu tin riba gobierno, y para e atakenan contra nos

empleadonan publico. Ta mama y tata di famia cu ta lanta tur mainta bay labora pa hiba e pais aki dilanti, y nan no merece e trato aki.

Tambe un apelacion directo na señor Mike Eman pa muestra lidersago y muestra cu bo ta para pa nos empleadonan. Y na Minister Arthur Dowers cu ta e minister encarga cu asuntonan di personal pa para pa proteccion di nos empleadonan.

Aruba merece lidersago firme, inspira y empatico. Tur e acusacionnan y menasanan pa investiga tin cu stop. Mas y mas nos ta scucha cu ta partido MEP ta esun cu ta orchestra tur loke ta pasando, pero esaki no ta berdad. Nos ta hibando un oposicion fuerte berdad, pero nos no ta den gobierno y nos no tin nada di haber den e situacion aki.

Tambe mi ta condena e echo cu Parlamentario Oduber a cuminsa tilda partido MEP bisando cu nos ta hunga bou di un capa cu Ministerio Publico. Esaki ta cosnan cu mi ta condena y rechasa. Nos conoce nos lug den Parlamento y desde aki nos ta haci nos preguntanan y tene nos conferencia nan. Tambe nos lo sigui



bishita nos proyectonan paso e gobierno aki no tin ningun proyecto pa “show off” cune paso tur ta di Gabinete Wever-Croes.

Pues mi kier pone bon cla cu partido MEP ta den e mesun shock cu henter comunidad ayera ora nos

a scucha kico ta pasando. E ta un berguensa pa pais Aruba y e ta importante pa esnan responsabel sali y bisa, mescos nan a bisa cu e departamentonan ta actua den cuadro di ley, sali bisa tambe cu e oposicion aki no tin nada di haber cu e asunto di screening.

Clasificados

SOLODIPUEBLO@GMAIL.COM
CEL. 585 9500

Minister Geoffrey Wever: E REVITALISACION DI CENTRO DI SAN NICOLAS A INICIA



San Nicolas, 9 juni 2025 - Dialuna mainta durante un conferencia di prensa Minister di Finansa, Asunto Economico y Sector Primario, mr. Geoffrey

Wevery Minister di Justicia y tambe Infraestructura, mr. Arthur Dowers, a inicia oficialmente e proyecto di revitalisacion di e centro di San Nicolas.



E momento simbolico di 'groundbreaking' ta marca un paso concreto den e ehecucion di e vision di Gabinete AVP-Futuro pa trece bida, actividad economico y prosperidad bek den e centro di San Nicolas.

E ultimo dos añanan inister Geoffrey Wever a traha riba e proyecto pa renoba e area rond di Postkantoor, Setar y Arubus, y e plan completo ta consisti di ampliacion di e trottoir, renoba e caminda, mas mata y tambe otro banda e construccion di un Farmers Market unda agricultornan por bende nan productonan y por bira un centro di encuentro pa nos ciudadanonan. E proyecto tambe lo encera e construccion di un speeltuyn pa asina atrae

mucha y mayor den e centro di San Nicolas. E promer fase a inicia awe cu ta e ampliacion di e trottoir banda di Postkantoor y Setar, renobacion di e caminda y mas mata y e di dos fase cu ta encera e construccion di e Farmers Market, e speeltuyn y embeyecemento di full e area ta den preparacion pa inicia pronto. Cu e proyecto di revitalizacion di e centro di San Nicolas cu a inicia awe, partidonan AVP y Futuro ta conecta proyectonan ehecuta bou di gabinete Eman I y II, manera e vierbaansweg, Carnaval Village, renobacion di Watertoren, Nicolaas Store etc. y ta demonstra e alineacion di e vision di Gabinete AVP-Futuro pa San Nicolas.

“E proyecto aki awe ta

bira un realidad dor di cooperacion di hopi hende, entre otro ex Minister Ursell Arends kende tambe tabata parti di e preparacion di e proyecto aki y cu a duna su aporte pa awe e proyecto por bira un realidad, arkitecto Raffy Kock, full e equipo di DOW, Arubaanse Wegenbouw y San Nicolas Business Association”, segun Minister Geoffrey Wever.

“E renobacion di e centro San Nicolas not solamente un obra fisico, pero un renobacion di speransa pa un comunidad cu tin hopi pa ofrece. E pueblo di San Nicolas merece un ciudad vibrante y digno, esaki ta simplemente e inicio!” Minister Wever a expresa.

**CAMBIA PERSPECTIVA
TOCANTE OBESIDAD:
SA BO NUMBER Y MIDI
BO PESO**



Parlamentario Dangui Oduber

MINISTER DI INFLACION SR. WEVER NO TA
COMBATIENDO E AUMENTO EXPLOSIVO DI
PRIJSNAN NA ARUBA!

Ta hopi fresco den nos memoria con minister Wever a bisa na varios ocasion cu frigidairenan na Aruba ta bashi y cu Partido Futuro lo percura pa yena esakinan. Na mes momento Partido Futuro a campaña pa mehora e poder di compra, mehora calidad di bida y percura pa ningun prijs na Aruba subi mas.

Awe ya caba minister Wever tin 75 dia den gobierno y net contrario ta pasando. Minister Wever ta e unico minister den e gabinete aki cu no por bay sconde tras di e hecho cu nan ta nobo y cu nan mester tempo. Esaki ta e di dos termino di minister Wever como minister di economia y hustamente e, mester tin un vision, un maneho y plan di accion concreto con pa combati pobreza y mehora e poder di compra na Aruba.

Minister Wever por wordo categorisa como e minister di inflacion. Nos ta hayando masha hopi mensahe y tur caminda nos bay pueblo ta expresa e preocupacion pa cu costo di bida, inflacion y prijsnan den supermercado. Tur dia prijsnan ta subiendo na Aruba y minister Wever kier pidi tempo pa traha riba un plan. Unda minister Wever tawata pa mas cu 4 aña pa traha riba un plan di accion?

Awe pueblo ta wordo castiga cu medida pa minister Wever. E propio minister Wever aki a regala pueblo un regalo di san valentino pa aumenta e prijs di gas residencial cu 30% pa un compania cu un ganashi di 13 milyon florin. Ta insolito cu te awe e no kier duna cuenta, e no kier bin parlamento y no kier coregi e decision aki cu ta

perhudica miles di hende cu ta bende cuminda na Aruba pa sobrebibi.

Prijs di lechi a subi cu 10% siendo lechi ta den canasta basico. Unda minister Wever ta pa controla productonan den canasta basico?

Prijs di coffee a subi cu 10% y minister di inflacion man crusa?

Prijs di 1 kilo di galiña a subi di 5.75 pa 8 florin, un aumento di 40% y minister Wever den gozo den concierto.

Nos fraccion ta sumanente preocupa cu e situacion explosivo di aumento di prijsnan na Aruba y nos ta mas preocupa aun cu tin un gobierno cu no tin vision y no tin plan holistico con pa percura pa un mihor calidad di bida pa nos hendenan. En todo caso, nan no a comparti nan plan di ningun



manera cu Parlamento di Aruba, haciendo e dificil pa controla e Gobierno aki.


Nos ta manda preguntanan pa gobierno y no ta haya contesta, nos ta pidi reunion y nan NO ta wordo yama! Mientrastanto tin inflacion, costo di bida haltisimo, prijsnanan subiendo tur dia, keto bay pueblo tin cu paga pa remedinan y nos tin un gobierno man crusa. Gobierno ta prefera pose riba potret na tur evento y encuentro enbes di bin den sala di parlamento y duna cuenta na pais Aruba kico nan ta haciendo berdaderamente pa atende cu e retonan actual!

CAMBIO DEN PRIJS DI PRODUCTIONAN
PETROLERO 11 DI JUNI 2025

ORANJESTAD - Minister di Finanzas, Asuntonan Economico y Sector Primario ta anuncia e prijsnan nobo di benta di combustibel entrante 11 di juni 2025:

| | |
|---------------------------|--------------------------------|
| Gasoline unleaded-premium | : 226,7 cen p/ltr. (+ 2,2 cen) |
| Diesel LS | : 185,6 cen p/ltr. (- 2,4 cen) |
| Kerosin | : 173,6 cen p/ltr. (- 4,9 cen) |

E prijsnan ta inclui BBO/BAZV/BAVP



MINISTER DI HUSTICIA ARTHUR DOWERS CREANDO UN AMBIENTE MAS SIGUR PA TUR

Den cuadro di su bishita oficial na Hulanda, Minister di Husticia di Aruba, mr. drs. Arthur Dowers, a tene un encuentro importante cu sr. Ronald Baarends, Director di Organisacion y Recurso Policial di Hulanda. E reunion ta parti di un serie di dialogo strategico pa fortifica e colaboracion existente entre Aruba y Hulanda den e area di husticia y siguridad.

Durante e reunion,

Minister Dowers y sr. Baarends a dialoga riba varios tema crucial, incluyendo:

- Cooperacion actual entre e cuerponan policial di Aruba y Hulanda, cu ta basa riba confiansa y intercambio continuo di experiencia y conocimiento.

- Ondermijning, un fenomeno peligroso cu ta minando e fundeshi di nos institucionnan y cu mester combati den forma structural y conhunto.

- Falta di personal den Landsrecherche, un

situacion cu ta crea presion riba investigacionnan y ta rekeri atencion inmediato.

- E rol y aporte di RST (Recherche Samenwerkingsteam), un elemento clave den e lucha contra crimen organisa y investigacion den Reino.

Minister Dowers a expresa su gratitud pa e apertura y cooperacion di e autoridadnan Hulandes, y a reforsa su compromiso pa sigui traha man den man riba un strategia comun cu ta pone siguridad y orden



publico como prioridad. E reunion cu sr. Baarends ta reforsa e obhetivo di Gabinete AVP-Futuro pa fortifica nos

institucionnan di ley, y pa crea un ambiente mas sigur pa cada habitante di Aruba.

Un colega servicial y profesional cu talento pa su trabou HOH SU EMPLEADO DI LUNA DI MEI TA ROBERTO MARTIJN



Coleganan di departamento di radiologia a ricibi un invitacion pa atende un reunion cu un anuncio importante. Cu un grupo di colega grandi presente sr. Gregory Croeze, miembro di Hunta di Directiva a anuncia e sorpresa cu tin un empleado di luna di meymey di nan. Tur a mira otro pa wak ta ken a sali y di un forma masha creativo cu sombre, sr. Croeze a pasa cerca varios colega pa na final yega na Roberto

Martijn y coron'e cu e sombre como empleado di luna di mei. Gritonan di alegria di su coleganan a trece un sonrisa masha grandi mes riba Roberto su cara y mas ainda ora ela mira su casa bula inespera su dilanti como sorpresa. Un nominacion y momento inolvidabel cu Roberto no a mira mes despues di 30 aña laborando na HOH.

Roberto ta conoci den su team

como un persona alegre cu semper ta dispuesto pa yuda su coleganan, pues un tremendo teamplayer. E ta trece ambiente den e team cu motiva otro y trece positivismo. E ta trata colega y pashentnan cu respet y e tin e don di calma pashent y duna nan un bon splicacion kico ta spera nan durante nan test. Loke tambe no por keda sin menciona ta cu Roberto ta un colega profesional cu hopi pasenshi y haci tur esfuerso posibel pa duna un servicio optimal na pashent.

Ademas, siguridad na pia di trabou tin prioridad halto pe, pues si mester e ta tuma accion di biaha y ta trece esaki dilanti pa yega na un solucion. E tin hopi talento pa su trabou, ta gusta e variacion y dinamica den su trabou y ta semper habri pa mehoracion y retonan nobo den e parti diagnostico.

Roberto ta un colega dedica, cu pasion pa su trabou y ta



gusta participa den decisionnan importante pa yuda realisa cambio y inovacionnan riba su departamento. Merecidamente ela wordo nomina pa bira empleado di luna. Hunta di Directiva, management y tur colega ta hopi contento di tin Roberto den nan team. Pabien Roberto!

MIKE DE MEZA A DUNA MINISTERIO PUBLICO ULTIMATUM: “SI NO DUNA CONTESTA PA 4'OR DI AYERATARDI, LO CUMINZA UN CASO CONTRA OM”

Solo di Pueblo – Den un desaroyo nobo, Mike de Meza a lansa un ultimatum na Ministerio Publico (OM) diamars, exigiendo claridad riba ki acusacion nan tin den su contra y ta di kico e ta wordo sospecha. Segun Noticiacla a raporta, e ultimatum a duna Ministerio Publico te cu ayeratardi 4'or pa duna contesta; sino De Meza lo tuma accion legal contra nan.

E situacion a surgi despues cu Belastingkantoer / Impuesto a presenta un keho penal contra De Meza, cu supuestamente ta inclui asuntonan di fraude fiscal i incumplimento cu obligacionnan di belasting. Sinembargo, te awor, OM no a duna detaye concreto riba e acusacionnan, loke a lanta frustracion di parti di De Meza i su defensa.

Mensahenan critico riba Red Soshal

Den medio di e tension, Desiree Croes, abogado di Mike de Meza, a publica varios mensahe na riba su pagina di Facebook cu aparentemente ta dirigi na premier Mike Eman. Entre e frasenan mas destaca ta:

“Den cas di mi tata, no tin luga pa traidor.”

“Ta reina silencio... Di indjan Arawak, nos a bira indjan Parawak.”

E mensahenan aki ta wordo interpreta como un critica na Eman, kende te ainda no a tuma un decesion riba e caso di De Meza. E silencio di Eman ta trece cune precion riba Mike de Meza y su team

Kico ta sigui?

Si OM no a aclara e caso ayeratardi pa 4'or,



Mike de Meza i su equipo legal ta prepara pa lansa un demanda contranan, alegando falta di cooperashon i violacion di su derechonan legal.

Solo di Pueblo lo sigui monitorea e desaroyonan di e caso i lo informa.

Parlamentario Dangui Oduber: A HACI MAS PREGUNTA NA MINISTER CICILIA TOCANTE E MOU FIRMA CU ROYAL SCHIPHOL GROUP

Miembro di Parlamento di Fraccion di MEP sr. Dangui Oduber ta keto bay preocupa cu e situacion cu tin na nos aeropuerto. A transcuri mas cu 70 dia y ainda parlamento di Aruba no a ricibi e MoU cu e wordo firma entre gobierno di Aruba y Royal Schiphol Group. Nos no sa kico tin di sconde y den cuadro di transparencia ta mas cu logico cu gobierno ta comparti e MoU aki cu parlamento di Aruba, cual te awe esey ainda no a sosode.

E contract entre AAA N.V. y Royal Schiphol Group lo vence aki 1 luna y gobierno ainda no kier duna claridad kico tur a wordo negosha y kico tur a wordo entrega na Schiphol. Pa es motibo sr. Dangui Oduber a dirigi varios pregunta na minister Cicilia pa asina haya e

informacion necesario pa informa comunidad debidamente.

Den e preguntanan cu a wordo haci a pidi minister Cicilia un biaha mas pa comparti e MoU cu parlamento. Parlamentario Dangui Oduber kier sa si gobierno di Aruba a bay di acuerdo cu TUR e condicionnan Schiphol. Tambe a puntra cua ta e condicionan cu AAA N.V./gobierno di Aruba tin pa por continua e relacion cu Schiphol Group.

Un di e diferencianan fundamental cu nos tawata tin cu Schiphol ta e hecho cu nos ta convenci cu nos tin profesionalnan local cu por maneha y lidera nos aeropuerto. Di otro banda Schiphol no tin confiansa den esey y nos ta nota

cu actual prome minister Eman tampoco tin confiansa den nos mesun profesionalnan. Nos mester como Arubiano, sinñ aprecia, respeta y balora nos talentonan y profesionalnan local y mi ta sinti tanto na sr Eman como sr Cicilia nan expresionnan cu nan NO ta balora ni respeta nos yuinan di tera. Nos semper a balora y aprecia trabounan di nos profesionalnan. Nos tin hende capaz, cu experiencia y conocimiento pa lidera nos aeropuerto pero mester por duna nan e oportunidad a haci esaki. Aña pasa december 2024 Schiphol Group a informa gobierno cu nan lo bandona Aruba e aña aki juli 2025. Pa es motibo nos kier sa kico ta e posicion di gobierno nobo. Nan SI lo acepta tur e condicionnan di Schiphol?

Nan SI lo acepta pa duna Schiphol un boardseat siendo cu nan NO ta shareholder di e compania?

Nan SI lo acepta un CEO di afo atrobe?

Nan SI lo menosprecia nos propio profesionalnan??

Nan SI lo haci excepcion di e LNT pa e CEO di airport y con lo para cu ATA, APA y tur e otro entidadnan di gobierno?

Nos fraccion a haci mas di 500 pregunta na gobierno pa asina nos por informa pueblo debidamente pero gobierno no a contesta ningun pregunta ainda. Nos ta lamenta con un hoben politico manera Wendrick Cicilia ta recurri pa hiba e mesun politica anticua di su tata politico Mike Eman!

CONFUSION NA NIVEL MUNDIAL TA SIGUI CU SU CONFLICTONAN

Situacion confuso ta sigui na Mundo. Prome motibo ta e cambio di poder global. Merca cu Nato ya no ta e unico poder na Mundo. Tambe gran parti ta pa motibo di Trump su bay y bin. E no sa kico e por logra, toch e ta pusha su ideanan. E ta keda cu su MAGA y America First, pero tur lidernan politico serio di paisnan na mundo ta ariba mesun liña pa nan pais. Eynan Trump a pega, pio si nos analisa e posicionnan malo di Merca e ultimo 100 añanan, cual posicionnan a crea dolor, pobresa y humiliacion di pueblonan na mundo.

Ta bon pa wak e situacionnan di conflicto na mundo, loke mi ta yama "The big Picture".

- Na Ucraina, Rusia ta ganando e guerra contra Ucraina/Nato/Merca, pero Ucraina fuerte y awor cu su accionnan terrorista, apoya pa UE (Union Europeo) y Inglatera;

- Na Israel, e guerra di Israel contra Hamas a bira un genocidio di Israel contra Palestinonan y Israel apoya grandemente pa paisnan di Nato, specialmente Merca/Trump;

- E Intencion di Israel pa bombardea e proyectonan nuclear di Iran, cu e apoyo di Merca, informacionnan di inteligencia Mericano ta bisa Trump pa no sigui Israel;

- E guerra di Merca contra China, cu Merca no sa ainda cual posicion e tin di tuma;

- Eguera na Africa di Merca/Francia contra e lidernan nobo di paisnan cu ideanan progresista y cual ideanan ta ricibi hopi apoyo na Africa y na mundo;

- E guerra di Merca contra Venezuela pa nan bira doño di e Petroli Venezolano.

E Big Picture ta muestra cu nos ta bibando un era hopi peligroso.

Prome punto di atencion ta e hecho cu ora analisa e posicionnan ta bisto cu tras di cada enemigo di Merca/Trump, nos ta wak e presencia di Rusia y China pa yuda e paisnan aki sobrevivi militarmente y progresa. Esaki

no ta di awor cu Trump a bira presidente, pero for di basta aña caba. E paisnan enolvi no tin nada di sconde, igualmente Rusia y China. Esaki ta haci e situacion peligroso ya cu Merca, China y sigur Rusia tin armanan nuclear. Rusia cu e arsenal Nuclear mas grandi y cu su armanan y misilnan sofistica cu Merca no ta pose'e. Loke ta hopi tenso ta e situacion na Ucraina, na Palestina y na Iran cualnan por bay for di man. Nos por bisa tambe cu e mundo Unipolar cu Merca/NATO, como e unico poder global mas grandi, for di 1991, ya na 2022 a cambia y awe nos ta biba den un mundo multipolar.

Awe e podernan grandi den e mundo multipolar ta China, Merca y Rusia. Nos sa tambe cu Rusia y China tin acuerdonan Bi-Lateral y den cada conflicto di e big Pictura nan ta uni.

Un aspecto pa menciona ta e conducta erratico di Trump. Di dos punto di atencion ta e conducto erratico di Trump, cu posicionnan cualnan no ta fijo y bo no por confia, aserca su actitud agresivo, tin biaha grosero, no diplomatico, hendenan ront di dje ta bisa cu e no ta lesa documentonan oficial. Semper e ta sali cu un posicion extremo y menasante, despues di scucha su expertonan, hopi biaha e ta dobla y acepta, pesey e tin e Nickname, TACO (Trump Always Chicken Out). Tambe otronan ta bisa, no duna balor na loke Trump ta bisa, pero wak e accionnan di Merca. Analisando e conflictonan di e Big Picture, Nos ta wak cu gobierno Trump, su expertonan pa atende e problemanan Internacional, varios biaha tin dos corriente contrali na otro, di su expertonan kendenan ta atende un conflicto. Sabiendo esaki por comprende Gobierno Trump mihor, pasobra e politica internacional di Trump ta confuso y ta cambia constantemente.

Prome nos tin Marco Rubio como ministro di Asuntonan Exterior. Semper e tabata un senador ultra-

derechista, contra tur gobierno progresista. Rubio no sa kico ta diplomacia y no por analisa posicionnan normal.

Richard Grenell, representante di e gobierno Trump pa misionnan special y tambe for di partido Conservador, e vocero di e gruponan Petrolero na Merca.

Michael Thomas Flynn ta un militar retira y tabata National Security Advisor di Trump for di su inauguracion te meimei di februari, un amigo 100% di Israel, pero a ser retira pa motibo di bisa cosnan cu no ta berdad.

Joseph K. Kellogg, Un ex-general, ultra-derechista, e funcionario apunta dor di Trump pa atende e conflicto Merca/Ucraina vs Rusia, pero ya despues di 2 luna a ser hala un banda for di e conflicto na Ucraina, igual na Marco Rubio. E negociador cu Rusia a bira Witkoff.

Steven Charles Witkoff ta un Real Estate Investor igual na Trump y a tuma e posicion di Flynn como su representante pa e conflicto na Palestina y na Iran entrante Februari 2025. Witkoff no ta un diplomatico, pero sa y ta comprende e posicionnan internacional mihor cu Rubio mes. Pesey e ta e funcionario cu Trump tin mas confiansa y kende awor ta envolvi den e conflictonan Rusia vs Ucraina, Israel/Merca vs Hamas, Israel/Merca vs Iran y China vs

Merca. Marco Rubio mes ta benta un banda. Witkoff ta e persona di Trump den e negociacionnan ariba conflictonan internacional. Pasando ariba e conflictonan di e Big Picture nos ta wak kico ta sosodiendo.

Guera di Ucraina, nos ta mira Nato/Merca vs Rusia.

Porfin, despues di e acuerdo Rusia-Ucraina na Istambul, Turkia na 2022, cual acuerdo ariba insistencia di Merca y Inglatera a ser rechasa despues pa Ucraina, Rusia cu Ucraina ta na mesa pa negocia, iniciando 2 juni 2025. Negociamento no ta bay manera mester ta. Rusia a entrega su proposicion y e ta mantene su posicionnan for di 2021, cual a ser entrega na Merca y na Nato na december 2021. E puntonan principal ta pa Ucraina reconoce e regionnan cu Rusia ta dominando, manera Lugansk, Donetsk, Zaporozhye y Kherson. Prome cu e negociacionnan Paisnan di UE (union Europeo) y Inglatera a purba di stroba cu un posicion pa partidonan bay di acuerdo cu un tregua di 30 dia.

E grupo di negociadornan di Trump, Rubio y Kellogg tambe a bay di di acuerdo cu e postura di Europeanonan. Rusia no kier papia mes ariba e idea aki. Trump

CONTINUA PAG. 11

Clasificados

SOLODIPUEBLO@GMAIL.COM

CEL.585 9500

CONFUSION NA NIVEL MUNDIAL TA SIGUI CU SU CONFLICTONAN

CONTINUACION PAG. 10

a hala Rubio y Kellog un banda, despues Trump a manda Witkoff papia cu Putin, tur cos a aclaria y Trump/Witkoff a ordena Zelensky pa bay negocia, cual a tuma lugar 2 juni.

Trump ta bel Putin 4 juni 2025
Den e situacion actual cu Ucraina perdiendo e guerra, Ucraina a inicia cu su accionnan di terrorismo, atacando blanconan civil na Rusia y cual ta ricibi tur apoyo di UE y di Inglatera. E atakenan aki por resulta peligroso si algo bay malo y envolvimento di Nato sali na cla. E atake ariba e avionnan strategico di Rusia, 2 juni 2025, despues cu negociacionnan a termina, a crea problema grandi pa Merca ya cu Merca y Rusia tin un acuerdo cu e avionnan strategico di Rusia y Merca ta den aire liber pa e satelitenan di Merca controla e avionnan Ruso y e satelitenan Ruso por controla e avionnan Mericano. Merca, CIA tin tur informacion di e avionnan strategico Ruso, Rusia no ta confia CIA y ni Merca.

Esaki a haci cu diaranson Trump a bel Putin y bisele cu Trump/Merca no tabata sa di e atake adelanta. Ucraina y Europa ta papia di 41 avion destrui, mientras Rusia a mostra videonan cu 3 avion cu daño, pero tur 3 por wordo drecha, segun e vocero di Rusia. Rusia su trupanen ta avansando y ta ser bisa cu e ehercito di Ucraina ta cerca di colapsa, pa falta di militarnan, falta di armanan sofistica y falta di hopi pa por hiba un guerra cu resultadonan positivo. E contesta di Rusia ariba e atakenan di 2 juni ultimo a trece un reaccion barbaro ariba Ucraina, cual a causa dañonan grandi. Ban wak si ta bini un acuerdo o e ehercito di Ucraina ta colapsa, cu e consecuencia di un pas logra ariba campo di bataya.

UE y GB (Gran Bretaña) no kier pas, nan ta apoya accionnan di

Ucraina.

E paisnan di EU y GB ta haci lo maximo pa no bini pas na Ucraina. Europa Occidente cu su tremendo infra-estructura y leynan social, toch awe nan ta den un proceso di deteryoro. Esaki debi na su lidernan debil, mal prepara, kendenan kier mantene posturanan anticua. Europa parce di ta perdi cu su posicionnan robes den e mundo cambiante awendia. Un politico izkierda a bisa cu UE y GB ta kere cu nan ta excepcional:

UE y GB a pasa den un periodo di prosperidad y seguridad.

UE y GB cu su 550 miyon di habitante ta pidi proteccion di Merca cu su 350 miyon habitante pa defende nan contra un Rusia cu 150 miyon habitante. E cifranan ta indica cu Europa ta hopi malpara. Cu e guerra na Ucraina, e gas natural barata for di Rusia no ta yega, cual ta haciendo daño na nan economia/prosperidad. Trump/Merca cu e posicion pa no sigui defende UE y GB si nan no paga pa e seguridad aki. Pues prosperidad y seguridad a termina. Europa ta sigui confuso. UE y GB no kier tende nada cu Rusia ta avansando y ta bay gana e guerra. Con un Rusia, cu segun

nan ta un pais atrasa por gana e guerra contra nan=Nato? Pues UE y GB ta sigui kere den derota di Rusia y nan ta duna tur apoya na Ucraina.

UE y GB tin plannan grandi pa construi un compleho militar pa produci arma, alegando nan mes for di Merca. Pa e compleho militar cuminsa duna su fruta, ta dura como 10 aña y paisnan di Europa mester destina 5% di na GDP na militarismo. Dor di presion di Merca, mayoria di armanan di guerra for di 1945, ta ser produci na Merca. Por bisa e unico industria lucrativo cu Merca ta pose'e, despues di e industria di auto. E postura di UE y GB ta un capitulo ariba su mes.

Guera Hamas contra Israel/Merca

E guerra por bisa cu a cuminsa for di a 1948, ora UNO a dicidi cu ta bini e estado di Israel y e estado Palestina. Israel constantemente a keda horta teritorio di Palestina. Na oktober 2023 a cuminsa un etapa nobo cu Hamas atacando soldanan Israeli y tambe un Kibbutz Israeli causando hopi morto, parti tambe dor di atake di trupanen Israeli. Hopi comentarista ta bisa cu e atake

di Hamas di 7 okt 2023 tabata pa stroba e Abraham Accords relaciona cu Saudi Arabia pa reconoce Israel y lubida e estado Palestino.

E reaccion di Israel ta devastador, pa nan, tur Palestino na Gaza ta un miembro di Hamas y nan a cuminsa bombardea Gaza sin fin, matando mas di 55 mil Palestino. E bombardeo aki ariba casnan di Palestinonan, schoolnan, universidadnan, Hospitalnan y otro sitionan pa duna atencion medico na poblacion, pa hendenan cu bon pensamiento, loke Israel ta haci, ta ser categorisa como genocidio. Tin condenanan di Corte internacional di Husticia, pero Israel cu ayudo di Merca ta rechasando esakinan. Abinivarios tregua y awor Hamas, Merca y Israel ta den negociamento pa otro tregua y pa termina e entrega di rehennan tanto dor di Hamas (+ 55) como dor di Israel. Israel tin como 10 mil Palestino deteni for di Gaza y West-bank, sin cu nan a presenta dilanti un Juez/Tribunal. Pues nan tambe ta cay bao di e categoria di rehen. Mientrastanto Israel ta sigui cu su matamento di Gazanonan sin

CONTINUA PAG. 12



Obituario



Publica serka nos anuncio di fayecimento di bo ser keri.
Nos tin 2 pakete pa ofrece;

Pakete 1: Anuncio di fayecimento te dia cu e defunto
ser dera

Gradicimento y invitashon pa misa pa 3 dia Afl 250,00

Pakete 2: Anuncio di fayecimento te dia cu e defunto
ser dera

Gradicimento y invitashon pa misa pa 3 dia

Na Canal 22 1x prome cu Noticiero 22 Afl 400,00

**Pa mas informashon por tuma contacto cu oficina na
585-9500 of na 741-4554**



CONFUSION NA NIVEL MUNDIAL TA SIGUI CU SU CONFLICTONAN

CONTINUACION PAG. 11

misericordia, Tambe na otro parti di Palestina, West-Bank Israel ta sigui cu su hortamento di tera di Palestinonan y gobierno ta duna e settlernan pa nan traha nan cas y nan finca. E asesinatonan ta cruel, awor na Gaza tin gangnan arma di Hudiunan cu ta mata Palestinonan kendenn ta bay busca cuminda. Tambe Hudiunan ta mata hopi di esnan cu ta duna ayudo humanitario na Palestinonan.

Trump cu regalonan Biyonario. Ultimo tempo tin varios acontecimentonan den mundo Arabe. Trump a bishita e paisnan Arabe mas rico, meimei di mei 2025, sin pasa na Israel. Na e paisnan aki Trump a ser ricibi ariba tapijt cora, esta un tremendo bonbini. Ademias Trump a ricibi regalonan di inversionnan biyonario pa companianan di su familia y tambe pa cierto industrianan/comerciantenan Mericano. Trump a keda contento y cada biaha ta papia di e reglonan aki. E mes a ricibi un avion Boeing 747, cual ta costa banda di 400 miyon dollar di Gatar. No tin informacion si e regalonan di mundo Arabe tin di haci cu reconocimiento di e Estado Palestino, cual cada biaha lidernan Arabe tin nan boca yen di e reconocimiento aki. Siman pasa dialuna 2 juni, na Amman, Jordania, mundo Arabe a bolbe reuni ariba e situacion alarmante na Gaza. Eynan desicion a cay:

- Cu ningun Pais Arabe ta bay tuma e 2,3 miyon Gazanonan;.
- Tambe pa Israel cambia su actitud radicalmente relaciona cu e boycott di cuminda medicina, awa y otro;
- Tambe pa un Tregua y reconocidmento di Palestina como un estado Independiente;
- Un delegacion di ministronan di e paisnan Arabe lo bay bishita West-Bank na

Palestina pa papia cu lidernan Palestno y nan mes wak kico ta pasando; Israel a nenga di ricibi nan cual a bira un insulta grandi pa e paisnan Arabe, specialmente Saudi Arabia. Mohamed Bin Salman e prins Heredero di Saudi Arabia den un declaracion directamente contra Israel y Merca a bisa pa nan stop cu e matamento sin fin di Palestinonan na Gaza, pa nan percura pa cuminda y tur necesidadnan cu e ser humano mester diariamente pa dreña Gaza y Reconoce Palestina como un estado independiente.

Voto den consejo di seguridad di UNO, diahubs 5 juni 2025, Merca para su so. 5 Juni 2025, den Consejo di Seguridad di Nacionnan Uni un resolucion a wordo treci pa yega na un tregua, tur rehen mester wordo libera, Israel ta stop cu matamento y bandona Gaza. 14 Pais di e total di 15 a vota pro, pues 3 pais, Alemania, Francia y Inglatera cualnan ta miembro di Nato. Merca a uza su veto y tranca tur cos. Un desicion mahos y baho di Trump/Merca. Na Gaza mes e bombardeonan ta sigui, mas Palestino ta muri y awor Israel ta uza e boycott di cuminda, awa, medicina y necesidadnan pa e Palestinonan, como arma di guerra. Lidernan Israeli ta papia abiertamente cu nan kier elimina tur Palestino for di Gaza.


Israel for di control, pero Accionnan ta den man di mundo Arabe y mundo Muslim. Pues Israel a bira un pais for di control, ora ta toca aspectonan humano. Lidernan poitico ta papia abiertamente con pa caba cu e palestinonan na Gaza. Mas baho ta cu parti grandi di Hudiunan na Israel ta apoya e ponencianan aki pa caba cu Palestinonan. Pues e aspectonan humano ta perdi serca lidernan politico y serca e pueblo di Israel. Israel ta for di control. Na UE, Lidernan politico ta sigui cu nan apoyo politico, economico , financiero y militar

na Israel pa e pais aki sigui asesina Palestinonan, pero den consejo di Seguridad 3 pais di Europa ta vota contra Israel. Na Merca e situacion ta otro. Ehempelnan cla ta loke Trump y otro lidernan Mericano ta bisa ariba e asunto aki. For di prensa nos sa di e posicion di e lider di e partido politico mas grandi na Hulanda, Wilders kende a bisa cu e ta apoyo Israel 100%, e a bay bebe koffie cu Netanyahu y bisando cu no tin genocidio cometi na Gaza. Tinsinialnan positivo for di Europa, tin manifestacionnan grandi di e poblacionnan pro Palestina y contra Israel, specialmente contra e genocidio cu ta wordo cometi contra Palestinonan. E hecho cu 3 pais di Europa den consejo di seguridad a vota contra Israel tin Israel mas Isola ainda. Claramente na mundo ta Merca so ta apoya Israel cu su genocidio. Accionnan awor ta den man di lidernan Arabe y otro lidernan Muslim na mundo kendenan cu boca grand ta bisa cu nan ta contra e genocidio ariba Palestinonan y

nan ta na fabor pa mundo completo incluyendo Merca y UE reconoce e Estado Palestino, tambe cu nan ta dispuesto pa lucha pa esaki. Awor ta e momento pa muestra nan solidaridad cu Palestina. Ban wak si e regalonan na Trump tin e prijs: Reconocimento di Estado Palestino.



























E intencion di Israel pa bombardea e laboratorionan Nuclear di Iran Israel pa hopi añanan caba ta bisa cu nan kier bombardea e sitionan di e industria nuclear di Iran. Apesar cu nan a mata mas di 55 mil Palestino, segun expertonan nan ta perdiendo e guerra contra Hamas y otro organisacionnan militar cu Iran ta apoya. E hutinan constantemente ta bombardea Israel cu misilnan y Israel no tin defensa contra e misilnan aki, cual sigur ta ser entrega dor di Iran na e Hutinan. Israel ta den un situacion dificil y nan kier un guerra cu Iran, pero nan mes no tin e armanan

CONTINUA PAG. 13



Paardenbaaistraat 10, Oranjestad, Aruba Tel.: (297) 525 - 7555
www.lottoaruba.com

Resultado: Sorteo di Merdia - June 10, 2025

|  <p>Sorteo # 4646</p> <p>4334</p> <p>6091</p> <p>2642</p> <p><p>X2</p><p><p>Sorteo # 4646</p><p>0159</p><p><p>X5</p><p><p>Sorteo # 2702</p><p>8159</p><p><p>Sorteo # 4646</p><p>9366</p><p>Scorpio</p><p><p>Sorteo # 1520</p><p>333</p><p><p>X5</p></p></p></p></p></p></p></p> | <table><tr><td><p>Sorteo #</p><p>0 x Jackpot</p><p>0 x Match 4+</p><p>0 x Match 4</p><p>0 x Afl. 12,00</p></td><td><table><tr><th>Joker</th><th>Letter</th></tr><tr><td colspan="2">Proximo Jackpot</td></tr><tr><td colspan="2">130.000,-</td></tr></table></td></tr><tr><td><p>Sorteo #</p><p>0 x Jackpot</p><p>0 x Match 4</p><p>0 x Afl 8,00</p></td><td><table><tr><th>Proximo Jackpot</th></tr><tr><td>107.000,-</td></tr></table></td></tr><tr><td><p>Sorteo #</p><p>0 x Jackpot</p><p>0 x match 4</p><p>0 x Afl. 500,00</p><p>0 x Afl 50,00</p><p>0 x Afl 15,00</p></td><td><table><tr><th>Mega Ball</th><th>Proximo Jackpot</th></tr><tr><td colspan="2">400.000,-</td></tr></table></td></tr><tr><td colspan="2"><p>Afl. 600.000,-</p></td></tr><tr><td><p>Sorteo #</p></td><td></td></tr></table> |  <p>Sorteo #</p> <p>0 x Jackpot</p> <p>0 x Match 4+</p> <p>0 x Match 4</p> <p>0 x Afl. 12,00</p> | <table><tr><th>Joker</th><th>Letter</th></tr><tr><td colspan="2">Proximo Jackpot</td></tr><tr><td colspan="2">130.000,-</td></tr></table> | Joker | Letter | Proximo Jackpot | | 130.000,- | |  <p>Sorteo #</p> <p>0 x Jackpot</p> <p>0 x Match 4</p> <p>0 x Afl 8,00</p> | <table><tr><th>Proximo Jackpot</th></tr><tr><td>107.000,-</td></tr></table> | Proximo Jackpot | 107.000,- |  <p>Sorteo #</p> <p>0 x Jackpot</p> <p>0 x match 4</p> <p>0 x Afl. 500,00</p> <p>0 x Afl 50,00</p> <p>0 x Afl 15,00</p> | <table><tr><th>Mega Ball</th><th>Proximo Jackpot</th></tr><tr><td colspan="2">400.000,-</td></tr></table> | Mega Ball | Proximo Jackpot | 400.000,- | |  <p>Afl. 600.000,-</p> | |  <p>Sorteo #</p> |  |
|--|--|---|--|------------------|--------|------------------|--|------------------|--|---|--|-----------------|------------------|--|--|-----------|-----------------|------------------|--|--|--|---|---|
|  <p>Sorteo #</p> <p>0 x Jackpot</p> <p>0 x Match 4+</p> <p>0 x Match 4</p> <p>0 x Afl. 12,00</p> | <table><tr><th>Joker</th><th>Letter</th></tr><tr><td colspan="2">Proximo Jackpot</td></tr><tr><td colspan="2">130.000,-</td></tr></table> | Joker | Letter | Proximo Jackpot | | 130.000,- | | | | | | | | | | | | | | | | | |
| Joker | Letter | | | | | | | | | | | | | | | | | | | | | | |
| Proximo Jackpot | | | | | | | | | | | | | | | | | | | | | | | |
| 130.000,- | | | | | | | | | | | | | | | | | | | | | | | |
|  <p>Sorteo #</p> <p>0 x Jackpot</p> <p>0 x Match 4</p> <p>0 x Afl 8,00</p> | <table><tr><th>Proximo Jackpot</th></tr><tr><td>107.000,-</td></tr></table> | Proximo Jackpot | 107.000,- | | | | | | | | | | | | | | | | | | | | |
| Proximo Jackpot | | | | | | | | | | | | | | | | | | | | | | | |
| 107.000,- | | | | | | | | | | | | | | | | | | | | | | | |
|  <p>Sorteo #</p> <p>0 x Jackpot</p> <p>0 x match 4</p> <p>0 x Afl. 500,00</p> <p>0 x Afl 50,00</p> <p>0 x Afl 15,00</p> | <table><tr><th>Mega Ball</th><th>Proximo Jackpot</th></tr><tr><td colspan="2">400.000,-</td></tr></table> | Mega Ball | Proximo Jackpot | 400.000,- | | | | | | | | | | | | | | | | | | | |
| Mega Ball | Proximo Jackpot | | | | | | | | | | | | | | | | | | | | | | |
| 400.000,- | | | | | | | | | | | | | | | | | | | | | | | |
|  <p>Afl. 600.000,-</p> | | | | | | | | | | | | | | | | | | | | | | | |
|  <p>Sorteo #</p> |  | | | | | | | | | | | | | | | | | | | | | | |

CONFUSION NA NIVEL MUNDIAL TA SIGUI CU SU CONFLICTONAN

CONTINUACION PAG. 12

pa por hiba e guerra aki. Pa e motibo aki Israel ta busca Merca pa bringa e guerra aki pa nan. Inteligencia Mericano a trece yen di consideracionnan na Trump pa tuma un desicion correcto. Segun Inteligencia Mericano, cu Iran na 2025 no ta e Iran di algun aña atras. Nan ta pose'e misilnan hypersonico y nan tin un bon defensa aereo cu hopi S-400, cumpra for di Rusia. Aserca Iran cu su conocimiento tecnologico a adapta hopi di e S-400-nan na e nivel di S-500, cualnan ta mas sofistica cu e S-400-nan. Pues Iran tin bon defensa y pa nan atake nan tin misilnan di atake cu Merca no ta pose'e. Nan tin bon aliansa cu Rusia y China.

Lo sali algo for di e negociacion na Muscat, capital di Oman? Merca no kier pa Iran traha su bom nuclear. Iran ta bisa cu pa motibo religioso, nan no ta construi un bom nuclear. Rusia y China tambe ta na favor pa Iran keda sin construi e bom nuclear. Tur e consideracionnan prome menciona a cambia, awor e posicion TrumpMerca ta pa negocia cu Iran. E negociacionan ta duro, ya tabatin 5 rondo di negociacion, sin resultado. Iran a sabiendo cu su posicion ta fuerte militarmente, politicamente, e ta un potencia petrolero grandi, Iran tin acuerdo cu e paisnan Arabe, manera Saudi Arabia, Union di Emiratonan Arabe, Gatar, Irak y mas. Iran tambe tin un paquete fuerte pa negocia. Sigur loke ta e fin di sancionnan di Merca contra Iran. E elogio di Trump na Rusia, pa nan intervencion como amigo di Iran y di Merca pa e negociacionnan ta un punto positivo pa yega na un bon final. Esaki ta un muestra cu ta bay yega na un acuerdo. Un acuerdo cu sigur Israel no lo bay gusta. Pa Trump un desicion dificil, pasobra na Wahington ta e lobby Hudiu, AIPAC (American Israel Public Affairs Committee) cu su

Dollarnan ta dicidi tur cos na favor di Israel. Na April, Trump a menasa Iran cu si no yega na un acuerdo, Merca lo bombardea Iran. Rusia y China semper a apoya Iran y nan a bisa Merca cu e solucion die conflictota un acuerdo uzando diplomacia, no menasa. Si bombardea e instalacionnan nuclear di Iran, esaki lo tin consecuencia pa mundo completo. Despues di e combersacion telefonico diamars 4 juni '25 di Trump cu Putin, Trump a scirbi ariba su "Truth Social Platform" cu Putin lo participa tambe den e deliberacionnan pa asina yega na conclusionnan rapido.

Portavos di Kremlin, Dmitry Peskov a confirma cu Putin a bisa Trump cu e relacion fuerte di Rusia cu Iran lo yuda contribui positivamente durante e negociacionnan.

Tin expertonan ta bisa cu e acuerdo di 2015, e JCPOA (Joint Comprehensive Plan of Action) e acuerdo di Iran cu UE y Merca y cual a ser rechasa dor di Trump na 2017, awor ta bira JCPOA II, ta bek ariba mesa. Otronan ta bisa cu e poder di Israel y AIPAC ta demasiado grandi y Trump no tabay acepta JCPOA II, pesey tin varios scenarionan cu por sali.

1. Ta yega na acuerdo, sancionnan contra Iran ta for di Mesa. Israel malcontento;
2. No tin acuerdo, pero Merca no ta bombardea y tur cos ta sigui manera e ta awe;
3. No tin acuerdo, Merca cu Rusia ta yega na acuerdo cu Merca ta bombardea un sitio nuclear bieuw, insignificante na Iran. Iran ta bombardea dos base militar Mericano na Irak y na Saudi-Arabia o na otro pais Arabe y tambe 2 base militar na Israel.

Conclusion, Trump a muestra su poder pa bombardea, Iran tambe no ta rindi, nan tambe ta ataca. Situacion ta sigui manera e ta awe. Despues den poco tempo, Merca ta cuminsa los e sancionnan. Trump contento, Israel contento, igual Iran.

Venezuela cu un bon futuro, China

y Merca interesa den e Petroli.

E eleccion di 25 mei ultimo a ser gana ampliamente dor di e partidonan cu ta apoya Presidente Maduro. No tin duda, Maduro tin amplio sosten di pueblo. Segun observadornan internacional Maduro, apesar di e situacion dificil na Venezuela, cu e mas di 960 sancion y boycott di Merca y UE y cu poco finansas, a hiba un bon administracion, atendiendo cu e problemanan di pueblo. Di dos ta cu Merca via USAID/CIA a stop di financia oposicion na Venezuela. Di e 285 puestonan den Asamblea Nacional (Parlamento), Maduro tin apoyo di 259. Un apoyo grandisimo.

Un analisis di e situacion petrolero actualmente na Merca y na mundo ta indica cu e situacion na Merca no ta di e bon ey. Mientras cu Trump/Merca a para e acuerdo di Venezuela cu e compania grandi di Merca Chevron. Merca mester di Petroli. Produccion di Shale=Esquistio na Merca ta fracasando, mayoria di posnan ta produci mas di 60% di awa y poco petroli. Prijs pa produci un bari petroli di hopi posnan di esquistio ta yegando \$ 60 pa barril. Merca mester di petroli y di unda? Venezuela!!! Ora nos wak e prijsnan pa saca un barril di petroli for di suelo, na Venezuela e ta un promedio di \$15 pa \$17, Saudi Arabia algo Ariba \$20 y na Merca cu tur e problemanan e ta entre 50\$ y 60\$.

Merca y China ta interesa den e Petroli, Venezuela cu tranquilidad politico den futuro.

Expertonan considerando e

situacion di Petroli na Mundo y specialmente na Merca unda e situacion petrolero na Merca den futuro sercano tin problema grandi, ta di opinion cu Trump ta bay hala Rubio un banda, e ta yama Maduro pa nan yega na Acuerdo ariba petroli di Venezuela. Trump semper ta cuminsa papia cu boca grandi y menasante, pero despues cu papia cu expertonan manera Grenel, ora e wak e realidad, e ta floha y baha cabeas. TACO! Mientrastanto dos compania Petrolero grandi di China a firma acuerdo cu Venezuela pa explora posnan di Petroli na Orinoco, e crudo pisa y na Zulia e crudo lihe.

Awor ta sali na cla cu esnan cu ta dirigi CITGO, e compania Venezolano na Merca cu Trump na 2019 a expropia y a regala e gang di ladronnan ront di Guaido. Esnan cu ta dirigi Citgo awe, for di investigacionnan ta sali na cla cu 20 biyon di dollar a desparce y tin un investigacion hudicial na Merca pa castiga esnan responsabel pa e robo aki. Tambe ta conoci cu Marco Rubio, Canciyer di Merca a ricibi miyonnan di Dollar for di Citgo.

Cu e perdida di Chevron y na su lugar dos empresa petrolera grandi di China ta muestra cu e futuro pa loke ta benta di petroli ta segura. Segun expertonan otro aña Venezuela ta bay produci 2 miyon barril pa dia. Aserca e resultado di e eleccion ta duna Venezuela, bao Maduro, un tranquilidad politico te 2030, Sigur mas despues tambe.

Pues Venezuela ta bay progresa.



Ministro di Husticia Arthur Dowers cu agenda yen na Hulanda

Durante su bishita di trabao na Hulanda, Minister di Husticia mr. drs. Arthur Dowers a bishita Nationaal Cybersecurity Centrum (NCSC), caminda a reuni cu e director di NCSC sr. Mathijs van Amelsfort.



NCSC ta forma parti di Ministerio di Husticia y Siguridad, y ta identifica riesgo y tendencia den e mundo digital. NCSC ta intercambia conocimiento ampliamente, conectando tur partner cu informacion y experticio. Ademas nan ta preveni daño social y ofrece apoyo durante crisis, cu un ekipo riba alerta 24/7. Door di e colaboracion nacional y internacional, NCSC ta fortalece e resiliencia digital di Hulanda y Reino. Durante e encuentro, Ministro Dowers y sr. Van Amelsfort a dialoga riba e panorama actual di siguridad cibernetico na Hulanda, incluyendo e expansion di e cantidad di organisacionnan protegi for di 250 pa 10.000. Ademas nan a papia di e ley nobo cu ta pone e responsabilidad personal riba esnan na cabes di organisacionnan den caso cu nan no cumpli cu

e exigencianan estableci riba nivel di siguridad cibernetico. Tambe a dialoga riba temanan manera menasa actual riba tereno digital, y a pone enfasis riba e importancia di cooperacion internacional, particular den cuadro di Reino Hulandes, mirando cu siguridad cibernetico

no tin frontera. E meta di e bishita aki ta pa explora e posibilidadnan pa fortifica colaboracion entre NCSC y Aruba, incluyendo desaroyo di un mecanismo pa duna apoyo di manera rapido, cu e meta pa amplia e capacidad di contraresta y comparti conocimiento den Reino.

TA BENDE: BBQ GRILL TIPO CRIYOYO I DURADERO



INFO JAMA:
5697787


TA BENDE:



“WELDING MASHIN 220v “
den bon Condicion.
Prijs AFL:250,
Info: jama
cel 5697787

Clasificados





SOLODIPUEBLO@GMAIL.COM

CEL.585 9500

SOLO Di Pueblo

Accidente cu hende herida na Avenida Milio Croes



SOPA DE LETRAS

| | | | | | | | | |
|---|---|---|---|---|---|---|---|---|
| P | P | F | E | G | Z | G | C | K |
| R | H | I | R | N | A | V | H | P |
| I | U | F | J | P | N | P | O | C |
| M | E | L | P | Q | A | O | C | O |
| A | V | O | A | T | H | L | O | N |
| V | O | R | S | V | O | L | L | E |
| E | S | E | C | U | R | I | A | J |
| R | C | S | U | E | I | T | T | O |
| A | M | R | A | E | A | O | E | F |

CONEJO
ZANAHORIA
CESTA
POLLITO
CHOCOLATE

FLORES
PASCUA
PRIMAVERA
HUEVOS

Dialuna mainta a drenta informe di un accidente cu hende herida na Avenida Milio Croes, mesora a dirigi tanto polis como ambulans na e sitio.

Na yegada di e patruya a bin compronde cu aki ta trata di un accidente pa falta di preferencia.

Debi na e fuerte impacto un persona di edad a resulta herida.

Na yegada di e ambulans nan a atende e persona.



SUDOKU

| | | | | | | | | |
|---|---|---|---|---|---|---|---|---|
| | | 8 | | 3 | | 5 | 4 | |
| 3 | | | 4 | | 7 | 9 | | |
| 4 | 1 | | | | 8 | | | 2 |
| | 4 | 3 | 5 | | 2 | | 6 | |
| 5 | | | | | | | | 8 |
| | 6 | | 3 | | 9 | 4 | 1 | |
| 1 | | | 8 | | | | 2 | 7 |
| | | 5 | 6 | | 3 | | | 4 |
| | 2 | 9 | | 7 | | 8 | | |

| | | | | | | | | |
|---|---|---|---|---|---|---|---|---|
| 8 | | | | | | | | |
| | | 3 | 6 | | | | | |
| | 7 | | | 9 | | 2 | | |
| | 5 | | | | 7 | | | |
| | | | | 4 | 5 | 7 | | |
| | | | 1 | | | | 3 | |
| | | 1 | | | | | 6 | 8 |
| | | 8 | 5 | | | | 1 | |
| | 9 | | | | | 4 | | |

| | | | | | | | | |
|---|---|---|---|---|---|---|---|---|
| | | | | | | | 3 | 9 |
| | 8 | | | | | | | 5 |
| | | 9 | | 6 | | 8 | | |
| | | 5 | | 9 | | | | 6 |
| 7 | | | | | | | | |
| | | 8 | 4 | | 6 | | | |
| | | 3 | | 8 | | | 5 | |
| | 2 | | 7 | | | 6 | | |
| 4 | | | | | | 1 | | |

DEN COMBATIMENTO DI OBESIDAD Y MALESANAN ASOCIA... PARLAMENTARIO DENNERICH KELLY TA BOGA PA AZV CUBRI GUIA DI DIETISTA

ORANJESTAD (10 di juni 2025) – Parlamentario Dennerich Kelly di fraccion AVP a trece dilanti e importancia di drecha e balansa den nos sistema di salud, mirando cu segun Kelly, e enfoke mayoria bes e tratamiento ta curativo, mientras tin profesional capacita pa brinda servicio den e aspecto preventivo cu no ta wordo cubri dor di AZV. E ta importante pa Kelly, pa e pashent haya e sosten necesario y esaki a largo plaso lo por ta mas efectivo pa caha di AZV.

“Tur gobernacion ta papia riba salud y tur programa ta enfoca riba e diagnostico y su tratamiento, sinembargo, durante e gobernacion aki mi ta bay pone enfasis riba e profesional di cuido,” asina Kelly a remarca.

Un tema prioritario, segun Kelly, ta obesidad; un cuestion cu ta sigui presenta su mes como reto grandi rond mundo pero tambe na Aruba. “Gobiernonan anterior a cera diferente convenio, pero nos no por keda sinta man crusa cu consehonan ariba papel so. A bira tempo cu parlamento ta tuma accion,” el a agrega. Kelly ta referi na diferente

elemento den e programa di gobernacion di Gabinete AVP–FUTURO, caminda capitulonnan ta trata cu salud publico, estilo di bida, hoben y muchanan y tambe movecion. Varios ta e iniciativa manera ampliamento di Linear Park y su mantencion, cuminda saludabel y varios cos mas. Ademá Kelly a elabora riba diferente rapportnan, por ehempel esun STEPS y esun di Scolnan Saludabel Aruba, di cual tin recomendacion buta riba papel, pero cu mester concretisa nan awor den accion.

Parlamentario Kelly ta insisti cu mester cambia e atencion for di maneho curativo (manera AZV ta haci generalmente) pa un sistema mas preventivo y integral, cu atencion special pa un pakete completo cu por inclui cosnan manera consulta cu dietista.

“Mi a tene reunion cu dietistanan, y como cu mi mes ta sali for di mundo di enfermeria, mi por duna testimonio cu nos tin falta di esey como sosten, vooral pa POH y dokternan di cas. Esaki lo permiti un sistema caminda por haya

orientacion y guia eficaz riba nutricion,” el a splica.

Ta bon conoci cu varios malesa cronico y cu actualmente ta representa un gasto halto den e presupuesto anual di AZV tin nan raiz den obesidad. Ta papia di, entre otro, malesa di curason, di sucu, di alzheimer, lomba, etc. Si ataca e problema for di su raiz y trata e obesidad, ta evita di yega na consecucionan mas costoso pa e aparato di cuido medico.

El a sigui pa bisa cu den su rol como parlamentario, lo sigui busca dialogo cu dietistanan y demas profesionalnan den cuido, pa promove adaptacion di e ley di AZV pa



inclui e tipo di cobertura aki. “Nos tin profesional capacita riba e isla cu por yuda eleva e

calidad di bida, basta cu nos duna nan e herment y sosten cu nan mester.”

Rosario Bibo diaranson 11 di juni na Alto Vista

Diaranson awo, 11 di juni, lo tin otro Rosario Bibo na Kapel di Alto Vista. Lo cuminsa resa pa 7 or y mey di anochi y tur presente lo por presenta nan intencion personal y general.

Lo resa hunto pa paz na mundo y den cada cas di famia na Aruba. Lo resa tambe pa tur enfermo, esnan den cas di cuido y pa nos hobennan.

Den nos orashon lo corda esnan tambe den necesiad material pa nan por haya alivio y solucion pa nan situacion.

Comision organisado ta invita tur hoben y adulto pa bin resa hunto na pia di nos Birgen di Alto Vista y pa tur intencion yega cerca Tata Celestial pa medio di intercesion di nos Mama Maria.

Oracion di dia

Un dia fructifero y cu e luz di Cristo por briya den cada un di nos

“... Pasobra tur hende cu halsa nan mes, lo keda humilia, ma esun cu humilia su mes, lo keda halsa”. Lucas 18,14

Awe nos ta lesa e importancia di humildad y reconoce nos faltanan. Nos por ta manera e fariseo husingando otro y halsando su mes of manera e cobrado di belasting ta reconoce su falta y su necesidad di compasion. Cu humildad nos ta sirbi otro sin busca recompensa; scucha mas y papia menos, na balora e otro nan pa loke nan ta y no pa loke nan tin of ta aparenta di ta. Reflexionando continuamente ta yuda evita na cay den orguyo y na mantene nos mirada fiho den e mision cu Señor a confia nos. Biba cu berdadero humildad ta nifica rechasa e mascaradanan cu hopi biaha nos ta pone pa impresiona of pa competi cu otro. No biba un bida superficial of di falsedad, sea un luz pa mundo unda e luz di Cristo ta briya den bo. Loke ta importa no ta con otro nan ta mira nos, sino con Dios ta mira nos. Ser bo mes y cu humildad ta acerca nos na e berdadero esencia di nos fe y esey ta haci nos un instrumento den e man di Dios.

Oracion : Señor Hesus, haci mi curason pareu na bo curason. Manso y humilde y obedecido na bo Santa boluntad.

Amen.

